

NAQQIUT

”Siumumiit ilisimalersimavarput periusissaqareersoq, taamaattumik Siumumiit tunngavilersuutivut innersuussuteqaaterpullu aalajangiiffigisassatut siunnersuummut allanngortipparput”

07. okt. 2016

UKA2016/98

Siunissaq qiviarlugu qanoq iluuseqarluta isumaginnermut ingerlatsinitsinni atorfinitsinikkut, ilinniartitsinikkut, pikkorissaaqqinnikkut sulisunillu ilinniarsimasunik annaasaqannginnissarput qulakkeerumallugit 2017-imi ukiakkut ataatsimiinnissami saqqummiunneqartussamik periusissanut iliuusissanullu pilersarusiornissaannik Naalakkersuisut peqquneqarnissaannik Inatsisartut aalajangiiffigisassaannik siunnersuut.

(Inatsisartuni ilaasortaq Peter Olsen, Inuit Ataqatigiit)

Qujanavugut Peter Olsen siunnersuutaanut, Siumumit oqallinnissamut soqutiginarumut ima oqaaseqassaagut.

Siumut isumaqarpoq inunnik isumaginninnikkut sullissinerit ikiorsiisernerillu tamarmik, naatsorsueriaatsit naleqassutsimik aallaaveqartut sakkugalugit, ingerlaavartumik nalilersorneqartariaqartut naleqqussarneqarlutillu. Taamaaliornikkut nunatsinni sullinneqartunut tamanut sullissineq pitsaanerpaaq naligiinnerusorlu anguneqassammat, tamannalu ineriartortinneqassaaq Namminersorlutik Oqartussat kommunillu suleqatigiinnerisigut. Isumaginninnikkut sullissineq imminut ikiornissamik aallaaveqartillugu ingerlanneqartassaaq.

Kommunini innuttaasunut sullissinerup qanoq inorsartiginera tusartualersimavarput, tusartualersimavarpullu sulisussaaleqineq pillugu atukkat qanoq oqimaatigilersimanagerat. Ila pissutsit ullumikkut isigisavut, takusavut erloqinartut amerlagaluassusii, inooqataaffigissallugillu ilungersunaraluassusii.

Maanna inunnik isumaginninnikkut ilinniartitaanerup killiffianik misissuinissaq pisariaqalersimavoq. Suunuku periarfissat pioreersut atorsinnaasavut pigivut? Maani nunaqavissut ilinniarluarsimasut atorluarnissaannut aporfissaqanngilagut, kisianniliuna apeqqutaasoq qanoq atorniarnervit? Qanorlu atugassaqartinniarivut? Inuit sullinneqarnissamik pisariaqartitsisut ima amerlatigilersimappata allaat immikkut iliuusissamik nassaartariaqarluta, taava suliat pioreersut atorsinnaasavut qiviaqqaartariaqarpavut.

Sulisinnaasut sulisinnaalersikkumallugit oqariartuuteqarpugut, taamaattumik ikiorsiissutinik pisartagaqarneq pillugu apeqqusiinerput eqqartornerusariaqarpavut. Meeqqanik sumiginnaaneq partiit tamakkerluta akuersaanngilarput, taamaattumik qalipaatersuunnata ataatsimooruttariaqarpavut. Inuit pineqartillugit naapeqatigiittumik suleqatigiinnissaq



avaqqunneqarsinnaanngilaq, ataatsimoorfeqarnissaq pillugu suleqatigiissitat pitsanngorsaaneermik malitseqartittarnissaat pisussaaffitsitut isigisariaqarpavut.

Taamaattumik inunnik attuumassuteqartunik ilinniagaqarneq sapinngisamik pisinnaatitaaffitsigut atugassarititaaffitsigullu pitsanngorsartuartariaqarpavut, ilinniarsimasullu atorfinitsinneqartarnerisa iluaqutissartai sulinermik ingerlatsinermik illuatungeriillutik suliaqartut aqqissugaanerusumik naleqqussarnissaat ingillutik eqqartueqatigiiffigilertariaqarpaat, tamatumani susassaqartut peqatigalugit aqqissuussinerit iluarsaanneqarsinnaapput. Nalunngilarput imminut pilliutigaluni sulineq immini peqqinnanngilluinnartuusooq. Tamanna sumiiffinni assigiinngitsuni uppersarsillugu takoreerparput.

Taamatut Siumumiit oqaaseqarluta periusissanik peqareernerput pillugu Naalakkersuisooq ilalerlugu siunnersuut itigartipparput.

Laura Táunâjik

Siumut